

Kous yol

(Migan mwen - Jean-François Liénafa)

Twel
pou fè vwel

Van
pou pran balan

Kous yol sé pa kous pawol
badjolè épi prélé gran djol
gro majol ki ka yen ki fè wol.

Fok jeté bon zié
pou pa chalviré
pas bouden kanno ki toujou wouvè
paré pou risouvè dlo tout là.

Ou pou fè plis ki sa ou pé fè,
pies lanm lanmè
pa pou fè'w pè.

Sé la ou ka wè
sa ki ni lestonmak foyapen,
yanm, dachin oben tinen.

Kous yol sé pa kous djendjen
pou moun ki ni mal ren,
fok ni bon janm, bon bra, bon tet,
menm si, pou sipòtè dèyè
ki pa ka soufè,
sé toujou an bel lafet...